



人 蕩 江 湖

英雄無淚

日頭唔好講人，夜晚唔好講鬼。阿飛好日唔提我老友阿錚，點知一提佢便在荃灣被捕，現時雖仍未提堂（不知是否阿飛眼花，照計咁大件事捉到疑犯提堂就無理由無新聞報導），但生死已是可卜。入到雜差房，你估第日番出嚟重可以馴落彈弓床咩，唔打到竊肺則幾稀矣，尤其是阿錚造低了差佬，個班老狗舐犢情深，推人及己，一定會好似當年打左仔一樣，報仇咁報，實行砌番夠本。

阿錚，阿飛此刻英雄無淚，唯恨而已。一恨未能拔刀相助，愧對知己；二恨從此無緣攜手合作，共闖天下。我相信法官如果唔判你死刑，大大話話也有十幾二十年監你坐，到時即使香港未解放，歲月催人，恐怕兄亦難一展身手了。每念及此，我便黯然神傷

，悲從中來。

悲傷起上來的時候，酒就是最好的朋友。近日來，阿飛放工後多流連酒吧，喝過死去活來。香港現時很難買到迷幻葯，但做個歇斯底里的現代劉伶也可以進入迷離虛幻、欲仙欲死的世界。阿飛雖然有七文化，但中學時代也讀過幾首蘇東坡、李白、辛棄疾的詩詞，一個時期學人扮過苦悶的文藝青年。那時候，少年不知愁滋味，為賦新詞強說愁，許多時，夜闌人靜，翻讀古人詩詞，不期然便悲情傷感起來。其實現在回想過去，就覺得非常好笑，十來歲的乳臭未乾小子又有什麼好憂好愁，毛主席話齋，無非是失戀、失學、無飯吃。如今，女人玩過，愛情有過，雖無事業，要搵飯吃也着實不難，獨是遺

憾天下不公，世界混帳，阿飛與阿靜一類英雄，竟然被壓社會之底，就像孫悟空一樣，永不超生。

啊！啊！我欲乘風歸去，醉死又何妨？

「文化新潮」的大師見我如此，彷彿是再世如來，連忙把我點醒：「買醉是一種逃避，逃避社會、逃避責任、逃避挑戰，醉了比沒醉的更具意識形態性，而且沒有進步的社會實際作用。」他你個媽的，難道我阿飛連這一點簡淺的道理也不明白嗎？人畢竟是人，總有他的缺陷，我又不可以一槍把世界轟碎，總不能天天把世界扛在自己肩上。上帝也需要休息，就當我忙裏偷閒吧！有時真不想做個有歷史自覺的人。

酒和女人可能天生是走在一起的商品（

商品？是的，我無醉，呢個世界邊個唔係商品？），幾年無見的ANNIE竟然偶然之間又重現眼前（看官諸君如果好記性，又係我嘅長期擁躉，應該記得佢）。那晚我獨個兒跑到灣仔的OLD CHINA HAND買醉，三杯下肚，正感無聊之際，忽然香氣（TO BE EXACT，騷氣才真）撲鼻，回頭一望，阿飛未及啓齒，一個妖艷的洋婦已經用力把我抱緊，血紅的朱唇直壓過來。

講真，那個時候阿飛經已不辨東西，話佢係女皇，老雞就老雞啦，趙佢先算。

「HI! ALFIE, MY HONEY BEE, GOTTA RECOGNIZE ME, YEAH?」

「OH! YOU BITCH, WHERE THE HELL YOUR'VE BEEN?」

到ANNIE開口，我先知道自己唔係錫緊老板娘，定神一看，難怪自己先前失覺，眼前的ANNIE幾乎就是第二個人。以前玲瓏浮凸的ANNIE，現在像洩了氣的皮球、皺了紋的沙發，面上痕跡斑斑固然不在話下，攬在我臂裏的身軀也差點三圍難分，簡直是一團肥豬肉。如果世界是有什麼不變定律的話，那麼我自創的阿飛定律應該是其中一條：女人的年齡和身裁應該成反比例，年齡

越大，身裁越每下愈況，就像男人的性能力一樣；除非你是程逸，幾十歲人重自認性能力強。當然佢未話俾你知，佢咁大個人做過愛未，如果重未，就梗係精力過人啦。我敢寫包單，成四十歲的處男，一射可以射到大西洋。

阿飛亦係重感情的人，我無乘機糟質ANNIE，話晒曾經上過床，總有一夜夫妻之義。當夜，我地重把酒言歡，暢談舊事。誰料一談之下，發覺同是天涯淪落人。

原來ANNIE嘅死鬼老公阿JACK早幾年被廉記捉到雞腳，雖然佢係鬼佬，算係自己人，但揸FIT過個阿JACK唔同呢個阿JACK咁品，少少地也判佢入籠兩年，身家亦被充公。ANNIE好難係當代貞烈，爲了兩餐，無理由同佢守生寡，一於離婚，但係二手貨要賣就梗係越賣越賤，就好似講古一樣，佢由高級警司轉嫁警司，一直轉手到現今的洋督察。莎莉麥蓮做「好女十八嫁」就話越嫁越好啫，ANNIE就有咁好命了。

聽說近年英國開發了個北海油田，英國經濟死咗半截，又有番啲生機，而香港啲銀紙則日日縮水，外地來嘅幫辦又有外快賺，生活水平已經越來越難與英國的同僚相比，因此好多幫辦老婆日日寫信去西報嘈生晒，

話如果唔加薪百分之八十，實行執包袱番祖家去，ANNIE講身世講到呢度，就更加向我大吐苦水。

不過，ANNIE可算唔好彩，搵錯對象。我平時已經好憎黃皮狗，白皮豬則更甚，依家老友入獄，就更加火上加油，我興起上嚟，就諷刺佢一番。

「WHY DON'T YOU TAKE SOME PART-TIME JOBS, SAY, SERVE THE PEOPLE OF HONG KONG WITH YOUR BODY. 做雞啦，橫掂中英關係空前大好，好多中國人都想試吓英國菜嘍。」我講到激動起來，居然講了中文。

老實講，家吓呢個世界，真係做雞好過做人，做賊好過做兵，男盜女娼，如果加百分之十七都話唔夠，點解唔掉轉槍頭，搶埋一份嘢。阿飛之流亦會本着階級感情，不念舊惡，實行非敵即友，同撈同煲。

當晚，我就係咁教訓咗阿ANNIE一頓，整到佢頭啱答，無晒癮。老友，如果你第日一百銀都可以趙番個鬼妹，記住來信多謝我阿飛。

李阿飛

